

Cussegl federal sto guardar sin ils raps

■ (rtr) Il cussegl federal quinta ils proxims onns cun in deficit structural malgrà il program da spargn. Il program da stabilitad che l'anteriura cussegliera federala Eveline Widmer-Schlumpf aveva instradà na tanscha betg. Ils respargns en il preventiv 2016 ed il program da stabilitad na tanschian betg per cuntanscher in equiliber structural, scriva il cussegl federal. Ils proxims onns creschia il deficit perquai constantamain.

L'onn 2017 quinta il cussegl federal cun in deficit da 500 milliuns francs – l'onn 2019 manca probabel gia ina mil-

liarda en cassa federala. Cunquai che l'economia en Svizra na saja betg creschida uschè fitg suenter ch'il curs minimal era vegnì schlià sajan er las perspectivas mendras. Il cussegl federal haja stuì cur-reger il plan d'entradas.

Expensas supplementaras

Ils proxims onns vegn i er a dar expensas supplementaras. Tranter auter pervi da la lescha davart la refurma da l'imposiziun da taglia sin interpresas e pervi dals daders che van en ils fonds da vias naziunales e dal traffic d'aglomeraziun. Vitiers

vegnian anc la refurma da la prevenziun per la vegliadetgna 2020 ed il dumber da dumondas d'asil che saja creschì marcantamain.

Libertad d'agir davent dal 2019

Il cussegl federal quinta che la situaziun sa normaliseschia puspè davent dal 2019. Lura èsi previs d'augmentar il plafond d'expensas da l'armada sin tschintg miliardi francs. Enfin la primavaira vul il departament da finanzas dal cusseglier federal *Ueli Maurer* preschentar ina proposta per l'agir dal proxim temp.